

Месяца ноября в 27-й день
 Празднование Пресвятей Владычице нашей Богородице и
 Приснодеве Марии,
 в честь иконы Ея, именуемая Абалакская.

На велицей вечерни

Блажен муж: 1-й антифон. На Господи, воззвах: стихиры на 8,
 глас 1:

Крайним Своим благоутробием Всевидец Господь,/
 человеческим родом ко спасению управляяй,/ многую благодать
 дарова Тебе, Богородице Пречистая:/ во образех бо мнозех, и в
 знамениих,/ и в чудесех являешия,/ яко твердое Православныя веры
 утверждение.

Неизреченную милость Свою роду человеческому даруя,/
 Христос Господь яви Тя, Чистая,/ верным людям Своим в
 защищение,/ и Твоею иконою чудотворною предстательство показа./
 Еюже укрепи страждущия души наша,/ да предстанем чисты Сыну
 Твоему, Богоневестная.

Дивным Своим Промыслом Владыка всех/ устрояет Тя,
 Нетленная Святая Дево,/ в предстательство земным известно:/
 столп бо облачный Израилю/ путеводитель бысть в землю
 обетованную,/ всемогущее же моление Твое, Пречистая,/ возносит
 верныя в Небесное блаженство.

Облак невещественный в брэнном телеси видящи,/ и Твоего,
 Богомати, чуднаго явления/ Божественное действо разумевши,/ во
 ужасе вдовица вопиет:/ несмы достойна видети/ славу Твою,
 Пренепорочная.

Вдовица явление иконы Богоматере узревши на воздухе/ и
 множицею о сем уверившиися истинно,/ глагола людем о чудеси, во
 Абалаце бывшем./ О, благонадежнаго Твоего промышления, Дево
 Чистая,/ скорая в бедах Заступнице.

Целительница безмездная земли Сибирстей/ явилася еси, Дево
 Богородице:/ кто бо, к иконе Твоей притекай,/ от смертоносныя
 язвы не исцелится?/ Болезни бо и немощи врачуеши,/ чудесная
 верным Помощнице.

Избранное место на Абалаце/ плодоносно чудесы Твоими
 явила еси,/ Пречистая Дево Богородице:/ повелела бо еси нову
 церковь людем Твоим создати,/ идеже имя Твое, Отроковице,

прославится/ во спасение наше и утверждение.

Слава, и ныне, глас 8:

Приидите, вернии,/ почтим икону Пречистыя Богородицы,/ во Абалакской веси чудно явившуюся,/ и достойно Приснодеву восхвалим,/ Сия Столп облачный явися,/ имже работы фараона мысленнаго свободихомся,/ Сия Камень горы Хорив показася,/ от негоже благодати миро исходится/ во исцеление недугов немощствующих,/ Сия есть Стамна манноприемная,/ Еюже Хлеба Небеснаго приобщаемся.

Вход. Прокимен дне. Чтения три Богородичная.

На литии стихиры, глас 2:

Приидите, Сибирстии народи,/ восхвалим Пречистую Богородицу,/ Яже явлением образа Своего/ дарует страждущим ослабу,/ скорбящим утешение,/ бедствующим избавление/ и всем верным велию милость.

Слава, и ныне, глас 8:

Кто, таковое преславное чудо видя, не дивится?/ Или кто, благоутробие Пречистыя разумеет, не ужаснется?/ Яко Дева Всенепорочная,/ в дожди гибельнем гнев Божий на милость преложивши,/ людем Своим утешение подаде,/ преста бо тещи поток водный/ и затворишася источники воздушнии./ Сего ради вопием Ти:/ радуйся, Благоутробная Владычице,/ скорбь на радость людем Своим всегда претворяющая!

На стиховне стихиры, глас 8:

Что Тя наречем, Богородице Дево?/ Зарю ли утреннюю,/ яко Христа, Солнце правды, нам предваряющая?/ Столп ли облачный,/ верных в землю обетованную путеводай?/ Ниву ли неоранную,/ Хлеб Жизни людем прозябшая?/ Егоже причащения нас сподоби,/ да обрящем живот вечный.

Стих: Осветил есть селение Свое Вышний,/ Бог посреде его и не подвижится.

Что Тя наречем, Богородице Дево?/ Цвет ли рая Божественнаго,/ яко весь Абалакскую украсила еси?/ Крин ли благоухания духовнаго,/ яко обитель Свою облагоухала еси?/ Сосуд ли мира многоценнаго,/ яко цельбы неоскудно излила еси?/ Сего ради молим Тя:/ сотвори нас достойны милости Твоея.

Стих: Предста Царица одесную Тебе в ризах позлащенных/ одеяна и преиспещрена.

Что Тя наречем, Богородице Дево?/ Источник ли живоносных вод,/ яко духовную жажду притекающих утоляеши?/ Стену ли крепкую,/ яко люди земли Сибирския надежно защищаеши?/ Лестнице известнейшая,/ к Небеси праведных скоро возводящая./ Темже моли Христа Бога/ спастися душам нашим.

Слава, и ныне, глас тойже:

Радуйтесь, сибирстии народи/ и вси людие **православнии**,/ яко явлением честнаго образа Пречистыя Девы во Абалаце/ град Тобольск просвещается./ Сего ради и мы от належащих нужд избавляемся/ и вопием Ти, Владычице:/ радуйся, благих Виновнице, известное христиан Упование.

На благословении хлебов тропарь, глас 4:

Днесь, яко солнце незаходимое,/ светло сияет образ Твой, Пречистая,/ в веси Абалакской на воздухе/ вдовице чудне явившийся./ И мы, припадающе к нему,/ Богородице умильно вопием:/ о, Всепетая Владычице,/ мир обители Твоей даруй/ и душам нашим велию милость.

На утрени

На Бог Господь: тропарь Богородицы, трижды.

По 1-м стихословии седален, глас 4:

Пресветлый образ Твой радость всем верующим приносит/ и, скорбей и напастей нас свободя,./ богатство благодати обители Твоей дарует./ К Тебе же прибегающие лютых бед избавляются/ и купно с Гавриилом пение приносят:/ радуйся, Благодатная, Господь с Тобою.

Слава, и ныне, тойже.

По 2-м стихословии седален, глас 4:

Божественным и светоносным явлением Твоим, Пренепорочная Дево, освяти славящая Тя/ и к стяжанию истиннаго благочестия настави,/ неложна бо еси Предводительница к вечному радованию./ Сего ради с любовью празднуем явление образа Твоего, славословяще Ти:/ радуйся, Благодатная, Господь с Тобою.

Слава, и ныне, тойже.

Величание общее или сие:

Величаем Тя,/ Пресвятая Дево,/ Богоизбранная Отроковице,/ и чтим образ Твой святой,/ егоже земли Сибирстей/ в покров и

заступление даровала еси.

Псалом избранный:

Велий Господь и хвален зело, во граде Бога нашего, в горе святей Его.

Преславная глаголашася о Тебе, Граде Божий.

Освятит ест селение Свое Вышний.

Свят храм Твой, дивен в правде.

Сия врата Господня, праведнии внидут в ня.

Предста Царица одесную Тебе в ризах позлащенных одеяна, преиспещрена.

Престол Твой, Боже, в век века: жезл правости, жезл царствия Твоего.

По полиелеи седален, глас 8:

Величие Твое кто повесть, Всенепорочная Дево?! Явлением Твоим всю страну Сибирскую удивила еси,/ благодать бо от иконы Твоя недуги многих уврачева и болезни исцели./ Сего ради к Тебе припадаем и тепле вопием:/ не лиши нас Твоя милости, безмездная Целительнице.

Слава, и ныне:

О, Всемилостивая Владычице!/ Не отрини нас, в бедах сущих, от Твоего заступления,/ но молитвами Твоими защити и спаси страну нашу от всякаго зла./ Да, Тобою хвалящаяся и на Тя все упование возлагающе,/ не постыдимся во веки.

Степенна, 1-й антифон 4-го гласа. Прокимен, глас 4: Помяну имя Твое/ во всяком роде и роде. Стих: Слыши, Дщи, и виждь, и приклони ухо Твое. Всякое дыхание да хвалит Господа: Евангелие от Луки, зачало 4.

По 50-м псалме стихира, глас 6:

Ныне наста празднество иконы Твоя, Пречистая,/ торжествуйте, людие,/ се бо светоносный образ на воздухе чудесне является/ и столпом облачным видимо утверждается;/ днесь правило веры и образ кротости духовныя сказуется,/ днесь сердечное к Богу обращение совершается/ и полнота покаяния проповедуется/ во спасение душ наших.

Канон, глас 8. Егоже краегранесие: Призри благосердием, Всепетая, Богородице.

Песнь 1

Ирмос: *Воду прошел, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.*

Прекрасный храме Трисолнечнаго Света,/ украси моя чувства, молюся,/ да целомудрен сый,/ честное Твое во Абалаце образа явление воспою, Чистая.

Радуюся, к Твоей честней иконе припадаю, Пречистая,/ душу мою просвети,/ тело от скверны очисти/ и, от лютых мя недугов свободивши,/ покажи причастника Небеснаго Царствия.

Изнемогающий ум мой направи, молю Тя, Едина Приснодево,/ к познанию Единого Сущаго Бога,/ и щедролюбие даруй ми,/ и благодатию Христовою украси мя, Богоблагодатная.

Зрящи греховность и худость естества моего,/ молю Тя, Дево:/ даждь ми познание моя немощи,/ да слезами многими омыю скверное мое житие,/ Едина Богоблаженная.

Песнь 3

Ирмос: *Небеснаго круга, Верхотворче Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,/ едине Человеколюбче.*

Ради милости Твоя низложи во мне прилоги бесовския,/ да, ум очистив и сердце уцеломудрив,/ к истинному богопознанию устремлюся, Едина Дево Всепетая.

Изволила еси столпом облачным/ явити доброту образа Твоего вдовице смиренней,/ тако и ныне призри на рабы Твоя,/ призывающия Тя и требующия Твоя помощи, Благодатная.

Будущее мучение, яко наказание за суету деяний греховных,/ и краткий всех вещей и всего мира тленнаго конец,/ помышляти сподоби мя, Дево,/ да благодатию Сына Твоего,/ на путь истиннаго покаяния наставлен,/ вечнаго осуждения избегну, Пренепорочная.

Любити ближняго и покрывати согрешения его даждь ми, Дево,/ честолюбие же, осуждение и празднословие отдали от мене,/ да плоды достойны принесу Сыну Твоему, Едина Пречистая.

Ин кондак, глас 4:

Абалакской иконе Владычицы нашей Богородицы,/ благоговейно поклоняющеся,/ со умилением взываем:/ спаси нас молитвами Твоими,/ Пресвятая Дево.

Седален, глас тойже:

Глаголы наша услыши, Владычице,/ призывающих Тя и требующих Твоя помощи,/ даруй нам на враги одоление/ и душам

нашим спасение,/ Ты бо еси Подательница благих,/ Небеси Царица/
и миру Помощница.

Песнь 4

Ирмос: Услышах, Господи,/ смотрения Твоего таинство,/ разумех дела Твоя/ и прославих Твое Божество.

О Тебе, Богомати, небесное торжествует сословие,/ с нимже и мы, земнороднии, празднуем днесь,/ прославляюще явление образа Твоего, Пречистая.

Сердце мое ожесточенное умягчи, Дево,/ и росую милосердия напои изсохшую душу мою,/ да, ближнему своему искренне послужив,/ прославлю Тя, Богоневесто Владычице.

Едина Приснодево,/ от тленных и временных ум мой отврати/ и, милосердием Твоим покрывши,/ пламень страстей моих угаси.

Рабское сребролюбие и забвение благочестия потреби от православных, Владычице,/ да, жизнь нескверную восприемше,/ невозбранно едиными усты восхвалят Тя, Приснодево.

Песнь 5

Ирмос: Просвети нас повелении Твоими, Господи,/ и мышцею Твоею высокою// Твой мир подаждь нам, Человеколюбче.

Дивнаго образа Богоматере явление,/ в немже святитель Николай наставляет вдовицу чистую/ о Твоем знамении поведати людем, Пренепорочная,/ да, тьму суеверия отгнавши,/ истинный свет спасения восприимут.

Исполни радости сердце мое, Пречистая,/ и, лютых соблазнов избавльши,/ мглу греховную развей/ и благостию Твоею храм чистоты и всякия добродетели мя соделай.

Едино души моя упование, Богородице,/ красная мира сего возненавидети мя настави, молю Тя, Чистая,/ да помрачения мысленнаго избавлься,/ улучу нетленное Сына Твоего наследие.

Молю Тя, Владычице,/ память смертную и благим воздаяние во мне утверди,/ да, сия выну во уме содержа,/ всякая беззакония оставлю/ и Царствия Небеснаго достигну.

Песнь 6

Ирмос: Молитву пролию ко Господу,/ и Тому возведу печали моя,/ яко зол душа моя исполнися,/ и живот мой аду приблизися,/ и молюся яко Иона:/ от тли, Боже, возведи мя.

Возводящи люди от тьмы греховныя/ явлением образа Твоего, Владычице,/ подаеши заступление и предстательство,/ да едиными

усты и чистым сердцем прославят Тя, Едина Пречистая.

Слова Божия Родительнице,/ зависти греховныя избави мя,/ да, искреннее братолюбие являя,/ жизни вечныя в Царстве Сына Твоего сподоблюся, Препоблагословенная.

Едина Богомати,/ радости мое сердце исполни/ и, печали мглу греховную скоро потребляющи,/ настави мя пети:/ радуйся, Благодатная, Спаса Христа нам рождшая.

Пресвятая Богородице,/ благодатию Твоею любовь к Сыну Твоему во мне возгрей/ и ближнему моему от души благотворити настави,/ да не предан буду Суду без милости,/ яко не сотворивый милости, Всенепорочная.

Кондак, глас 4:

Евангелия Христова благовестник Лука/ образы Твоя, Пречистая, древле изобрази,/ вдовица же, един от них чудне узревши,/ возвести нам повеление Твое,/ да вернии, к Тебе притекающе, зовут:/ радуйся, Владычице,/ Знамение милости Твоя нам являющая.

Икос:

Твоего преславнаго явления чудо, Богородице, во Абалаце/ почитающих Тя утешает и укрепляет:/ земнородным бо подаеши независтную исцеления радость,/ еуже и земля Сибирская, преизобильно обогатившись,/ веселится ныне и непрестанно вопиет Ти:

радуйся, прибежище наше и упование;

радуйся, неисповедимая всем радости.

Радуйся, образом Своим святым нас просвещающая;

радуйся, исцеление всем скоро подающая.

Радуйся, от бед и скорбей избавление;

радуйся, обители Абалакской и всея Сибири защищение.

Радуйся, Владычице, знамение милости Твоя нам являющая.

Песнь 7

Ирмос: От Иудеи дошедше, отроцы/ в Вавилоне иногда/ верую Тройческою пламень пещный попраша, поюще:/ отцев Боже, благословен еси.

Ангельский лик на небеси песнословит пресветлое Твое явление/ и человеческий род восхваляет Тя на земли, Пренепорочная Богородице,/ яко Мати сущи Живота,/ молиши о нас Сына Твоего,

Христа Бога нашего, поющих:/ отцев Боже, благословен еси.

Ядию в тление падших люте/ Рождеством Твоим возставила еси, Богородице Дево./ Сего ради презрение временных и желание благ вечных подаждь верою поющим:/ отцев Боже, благословен еси.

Бесовския прилоги потребляющи,/ похоти плотския укроти во мне, Дево,/ и, души моей здравие дарующи,/ сподоби вкупе со святыми пети:/ отцев Боже, благословен еси.

Оскверних душу мою грехами многими/ и невоздержанием всяческим сотворих себе непотребна пред Тобою, Пречистая Владычице,/ но очисти мя и на богоугодное житие настави,/ да со святыми вкупе воспою:/ отцев Боже, благословен еси.

Песнь 8

***Ирмос:** Царя Небснаго,/ Егоже поют вои Ангельстии,/ хвалите и превозносите во вся веки.*

Греховное томление души моя утоли, Богородице,/ росую же благодати Твоя совестное жжение угаси/ и, от клеветы наветующих избавльши,/ ненависть и памятозлобие отврати от мене, да благодарне воспою:/ хвалите Бога и превозносите Его во вся веки.

Образ Твой, Богородице, во Абалаце явльшийся,/ помощь и заступление подает всем, с верою к нему притекающим и благодарне вопиющим:/ хвалите Бога и превозносите Его во вся веки.

Радость вместо печали души моей подаждь, Всечистая,/ и милостию Твоею утверди в мире сердце мое,/ мятеж мира сего потребляющи, да благодарне воспою:/ хвалите Бога и превозносите Его во вся веки.

О, Пренепорочная Дево,/ терпение твердое даруй ми во искушении,/ кротостию и незлобием исполни мя во озлоблении,/ да, радуясь, воспою:/ хвалите Бога и превозносите Его во вся веки.

Песнь 9

***Ирмос:** Воистинну Богородицу/ Тя исповедуем,/ спасеннии Тобою, Дево Чистая,/ со безплотными лики Тя величающе.*

Дом Пречистыя Богородицы явился обитель Абалакская,/ в немже чудотворный образ пребывает,/ яко знамение спасения земли Сибирстей/ и всем, с верою к нему притекающим.

Исполни радости сердце мое, Дево Чистая,/ унывающего мя оживи/ и отчаянием падшаго возстави,/ леность же души моя

потребляющи,/ во всяцей добродетели укрепи,/ да со безплотными лики непрестанно Тя величаю.

Целомудренно сердце созижди во мне, Приснодево Богородице,/ ко исполнению воли Сына Твоего присно наставляющи,/ и в молитве постоянство даруй ми,/ Путеводительнице моего спасения.

Единая Пречистая Чистая Приснодево,/ многия милости образом Твоим чудотворным во Абалаце нам явившая,/ ныне благодарственное славословие воспеваем Ти:/ радуйся, Благодатная, земли Сибирстей Покров и Утверждение.

Светилен:

Достойное пение воздадим днесь, вернии, Рождшей всех святых Святейшее Слово,/ Сия бо есть нетленный Сосуд чистоты и истинная Приснодева,/ от греховныя нечистоты предстательством Своим нас избавляющая.

Слава, и ныне, тойже.

На хвалитех стихиры на 4, глас 4:

Днесь торжествует славный град Тобольск,/ радуясь посещению Девы Богородицы,/ Сия бо явлением образа Своего/ всей земли Сибирстей явилася еси Заступница/ от находящих бед и многих скорбей,/ покрывающи верныя люди/ честным Своим омофором.

Преславное Твое во Абалаце явление,/ Пренепорочная Владычице,/ недугующим есть исцеление,/ слепым прозрение, хромым хождение,/ грешным с Богом примирение,/ всем верным торжество спасительное/ и во истинней вере утверждение.

Ныне пророчестии глаголы Твоя, Богомати, исполняются,/ вси бо роди Тя достойно ублажают,/ с нимиже и людие Сибирстии днесь светло празднуют,/ яко чудеса Твоими, Богомати,/ от Абалакского образа Твоего/ помощь благодатную скоро получают,/ в вере и благочестии наставляются,/ в надежди на милость Божию укрепляются/ и в любви к Тебе и Сыну Твоему утверждаются.

Росоносною Духа благодатию/ исцели болезнующую мою душу/ и даждь ми плач о гресех моих, Владычице,/ и не яви мя врагом быти радование,/ но благодатию Пречестнаго образа Твоего/ отжени от мене мглу страстей душевредную и просвети светом Сына Твоего, // Всенепорочная Владычице.

Роди человечестии с верою несумненною/ притекают к Тебе, Богородице,/ скоро бо подаеши душам нашим исцеление,/ врагов наших студно посрамляеши/ и благодатию пречистаго образа Твоего/ просвещаеши светом Сына Твоего,/ Всенепорочная Владычице.

Слава, и ныне, глас 8:

Приидите, сибирстии народи,/ приидите, приступите и просветитесь,/ се бо во славе Божией Царица Небесная/ со святителем и чудотворцем Николаем/ и преподобною Мариєю Египетскою/ пресветлым Своим предстоит образом,/ да спасет обитель Свою и страну Сибирскую./ Еюже дуси лукавии прогоняются,/ болезни исцеляются,/ и все естество человеческое,/ вину избавления своего Тобою приемши,/ с любовию вопиет Ти:// радуйся, Владычице, знамение милости Твоя нам являющая.

Славословие великое. Ектении. И отпуст.

На Литургии

Блаженны от канона, песни 3-я и 6-я. Прокимен, глас 3, песнь Богородицы: Величит душа моя Господа/ и возрадовася дух Мой о Бозе, Спасе Моем. Стих: Яко призре на смирение рабы Своея, се бо от ныне ублажат Мя вси роди. Апостол ко Евреем, зачало 320. Евангелие от Луки, зачало 54. Причастен: Чашу спасения прииму:

Молитва

О, Пресвятая Госпоже, Дево Богородице, вышшая Херувим и Серафим, и всех святых Святейшая! Ты, Всеблагая, во Абалаце икону Твою многоцелебную явити благоволила еси, и ею многая и неизреченная чудеса соделала еси, и ныне содеваеши по Твоему неизреченному к нам милосердию. Тебе, Препоблагословенней рода нашего Заступнице, припадаем и молимся, вкупе со святителем Николаем и преподобною Мариєю Египетскою, да не лишимся их ходатайства и Твоего заступления и покрова державнаго. Спаси и защити нас, Владычице, от разжженных стрел лукаваго, укрепи немощную волю нашу к деланию заповедей Христовых, умягчи окамененная сердца наша любовию к Богу и ближним, даруй нам сокрушение сердечное и покаяние истинное, да очистившися от скверны греховныя и избавльшися от неведения и забвения, восставше от лености и нерадения, возможем принести Творцу благоугодныя Ему плоды добрых дел и сподобитися мирныя

христианския кончины и ответа правого на Страшнем и нелицеприятнем Суде Его. О, Госпоже Всемиловитая! В час грозный смертный наипаче яви нам Твое многомогущее заступление, ускори тогда на помощь к нам, и державною рукою Твоею исхити нас из власти лютаго миродержца, ибо воистинну много может молитва Твоя пред лицом Господа, и вся возможна суть ходатайству Твоему, аще токмо восхощеша. Темже на святой образ Твой умиленно взирающе и пред ним Тебе покланяющеся, со упованием благим сами себе, и друг друга, и весь живот наш Тебе по Бозе молитвенно предаем и Тя величаем с рождшимся от Тебе Спасителем нашим, Господом Иисусом Христом, Емуже, со Безначальным Его Отцем и Пресвятым Духом, подобает всякая слава, честь и поклонение, ныне и присно и во веки веков. Аминь.

Ина молитва.

О, Всеблагословенная Владычице наша, Богородице и Приснодево Марие! Приими сию молитву, Тебе ныне приносимую от нас, недостойных рабов Твоих, к цельбоносному образу Твоему со умилением притекающих, и с верою просящих благодатныя помощи. О надеждо наша, Мати Божия, помози всем бедствующим, обидимым, больным, путешествующим, гладствующим, приюти сирот, благослови всех детей, направи к добру всяку юность, православному воинству споборствуй, укрепи в чистом житии возрастных, всяку старость соделай образом святых жизни, укрепи надеждо умирающих, всех грешников приведи к покаянию, истреби тьму язычества, неверия, ересей и расколов, просвети нас светом Небесным, даруй мир душам нашим, всех введи в познание Истины Божией, всех направи на путь истинный и спаси нас. Аминь.

Ина молитва.

О, Пресвятая Владычице наша Богородице, милосердия источнице, покрове, упование и прибежище христиан, к Тебе прибегающих! Тебе, Всесильней Предстательнице и Споручнице покаяния и спасения нашего, мы, грешнии рабы Твои, вручаем души и тела наша, входы и исходы, веру и упование наша, кончину и число дней наших, глаголы и помышления, дела и начинания. Ты же, Милостивая Мати Божия, нами руководствуй, покрывай, соблюдай и спасай нас от всех козней вражеских невреждо, да немолчно до последнего издыхания взываем Ти: Радуйся, Невесто Невестная!

Радуйся, Святая святых большая! Пресвятая Богородице, спаси нас.
Аминь.